

MANIFESTAZIOAREN ONDOTIK. Presidenteak dio garrantzitsuagoa dela Parlamentuan irabazi izana protesta baino

Sanzek dio orain eremu mistoko udalek ele biz utz dezaketela errotulazioa

Dekretuaren helburua administrazioan sartzeko nafar guztien arteko berdintasuna bermatzea dela adierazi du

Alberto Barandiaran | IRUÑEA

Nafarroako presidente Miguel Sanzek atzo adierazi zuenez, errotulazioa ele biz utzi nahi duten eremu mistoko udalek egin ahal izango dute baita oraingo dekretuarekin ere, «bertako errotulazioen oinarrian nahikaria egongo baita, eta ez derrihortasuna».

Sanzek hala adierazi zuen atzoko gobernu bilkuraren ondoren eman zuen prentsurrekoan, nabarmendu ondoren larunbateko manifestazioa baino garrantzitsuagoa iruditzen zaio la joan den ostegunean Parlamentuan egindako osoko bilkuran dekretuaren alde 50 parlamentarioetatik 36 alde agertu izana. Galdetu ziotenean ea dekretuak garbi esaten zuen udalek errotulazioa erabaki ahal izango dutela, Sanzek adierazi zuen dekretuan «ahal» aditza agertzen dela horrelako kasuetan.

Sanzen zehaztapenak garrantzitsuak dira dekretuaren ondoko balorazioetan behin baino gehiagotan salatu delako udal autonomiaren aurka jotzeko zegoen asmoa. Halaber, toki eze-rosoan uzten dute esaterako Iruñeko Udalaren idazkari jauna. Jesus Lordak, txosten batean, nabarmendu zuen Iruñeko Udalak aldatu egin beharko zituela euskararen ordenantzak, eta errotulazio guztia erdara hutsez egin beharko litzatekeela hemendik aurrera.

«Nafarren arteko berdintasuna bultzatu nahi dugu»

Atzoko agerraldian, Sanzek beriziki gogoratu nahi izan zuen



JOXE LACALLE
Miguel Sanz, Nafarroako lehendakaria, atzoko agerraldian.

bere gobernuaren asmoa «nafar guztien arteko berdintasuna ziurtatzea» dela, eta kritikatu zuen hain zuzen ere errotulazioa edo bide seinaleen aferari erreparatu izana. «Errotulazio-

ena aipatzea, hori faltsukeria da, dekretuaren benetako asmoa ezkutatzeko nahikeria», esan zuen. Ukatu zuen, ildo horretan, bide seinaleen aldaketak inolako kosturik izango duenik

ESANAK

MIGUEL SANZ
Nafarroako presidentea

«Errotulazioena aipatzea faltsukeria da, dekretuaren benetako helburua ezkutatzeara»

«Euskararen garapenerako biderik onena zona batean koofizial egitea da»

«Euskara askatasunez garatzen utzi behar da, amildegia salbaezina ez izateko hitz egiten ez dugunontzat»

«Bide okerrera da manifestazio panfletarioetan kokatzea, eta etarren karteletan»

«Udalek ele biz jarri ahal izanen dute errotulazioa, dekretuak ez baitu derrigortasuna adierazten»

nahi dutela diotenendako. «Garbi esan behar da dekretua ez doala ikastolen edo D ereduaren kontra, ezta diru laguntzen kontra ere. Gobernu honek ez ditu ezta aldatu ere egin euskararen garapenerako urtero bideratzen diren diru sailak».

Onarpen mailaren jaitsiera

Miguel Sanzek galdetu egin zuen gero, zer dela-eta beldurra euskarak izan lezakeen beherakadaz. «Esaten badute euskara gero eta onartuago dagoela gizartean, zergatik jaitsiko da onespen maila dekretu bakar bat onesteagatik, ez bada kulturarekin eta komunikazioarekin zerikusirik ez duten helburuak zeudelako? Zergatik jaitsiko litzateke euskarazko ereduaren matrikulazioa dekretu honekin?».

Horrekin batera, presidenteak euskararen aldekoen eta kontrakoen erdian kokatu nahi izan zuen bere burua, eta ez alde batekoek ez bestekoek inolako arrazoirik ez zutela esan zuen. «Euskararen garapenerako gobernu honek aurkitu duen biderik onena da Nafarroako zona batean koofizial egitea, eta hautatzeko askatasunak eta normaltasun demokratikoak zehaztutako bidean jartzea; bide okerrera da manifestazio panfletarioetan kokatzea, eta etarren karteletan».

Halaber, esan zuenez, euskarari egiten ahal zaion mesederik handiena «askatasunez garatzen uztea da, ez dadin amildegia salbaezina izan hitz egiten ez dugunontzat, eta egunen batean jauzi hori egin dezagun».

JUAN JOSE LIZARBE

PSNko Idazkari Nagusia

«Errotulazioetan 'Iruñea' ez jartzea, hori jendea izorratzeko gogo da»

PSNko idazkari nagusi Juan Jose Lizarbek defendatu zuen atzo administrazioan euskararen erabilera arautzeko dekretua, baina kritikatu errotulazioan gaztelania nagusi bihurtzeko asmoa. «Gure ustez, administrazioan sartzeko hiritarren berdintasuna defendatzea onargarria da, baina oso bestelakoa da autobien bide seinaleetan Pamplona bakarrik jartzea, eta ez Iruñea: hori jendea izorratzea da». Larunbateko manifestazioa «garrantzitsua» izan zela onartu ondoren, dekretua defendagarria zela adierazi zuen Lizarbek, eta «sumina» eragin nahi dituzten ekintzak kritikatu zituen.

PERNANDO BARRENA

EHko parlamentarioa

«Dekretuari kalean eta desobedientzia eginez erantzun behar zaio»

EHko foru parlamentario Perno Barrenak administrazioaren dekretuaren aurrean desobedientzia aldarrikatu zuen atzo, eta, bide batez, gobernuaren azken erabakiak garbi errefusatu ez dituzten alderdiak kritikatu zituen. «Jakin bezate UPN, PSN eta CDNko jaun horiek, hizkuntza eskubideak urratzearen aldeko hautua egiten badute nafarron borondatearen kontrako ariko direla», adierazi zuen. Parlamentarioak nabarmendu zuen larunbateko manifestazioaren arrakasta, eta euskararen normalizazioari trabarik ez dutela onartuko adierazi zuen.

BEGOÑA ERRAZTI

EAKo lehendakaria

«UPN bakarrik gelditzen ari da European hizkuntza gutxitu baten aurka lanean»

Begoña Erraztik kritikatu zuen atzo UPNko gobernuak bakarrik gelditzen ari dela European hizkuntza gutxitu baten aurka legeak egiten, eta Euroitunean onartutako konpromisoak ere ez dela betetzen ari. «Euskararen kontrako erasoez hitz egiten badugu, aipatu behar da UPNk arerioak ikusten dituela, garatu eta elikatu behar den ondasuna ikusi beharrean», adierazi zuen Erraztik. «Abenduaren 11ko dekretua ez da irudizko arerioa, baina araudi bat, eta araudi horrek behartu egiten du foru administrazioa ez axolati agertzen euskararen aurrean».